
ԿԻԼԻԿԻԱՅԻ ՀԱՅ ԱԶԳԱԲՆԱԿՉՈՒԹՅՈՒՆԸ ԵՎ ՎԱՐՉԱԿԱՆ
ԲԱԺԱՆՈՒՄԸ XIX ԴԱՐԻ ՎԵՐՁԻՆ ԵՎ XX ԴԱՐԻ ՄԿԶԲԻՆ

ԳԱՍՊԱՐՅԱՆ Ռ. Հ.

Հայերի՝ Կիլիկիայի հետ կապերի հաստատման առաջին տեղեկությունները մեզ հասել են Աքեմենյան Պարսկաստանի տիրակալ Դարեհ Վշտասպի թագավորության տարիներից, երբ նրանք այդ հարուստ երկրամասի վրայով առևտուր էին անում Եգիպտոսի և Փյունիկիայի հետ: Դարեհի օրոք Կիլիկիան Աքեմենյան հսկայածավալ տերության 4-րդ սատրապության կազմում էր՝ տարեկան արքունի գանձարան մուծելով 300 տաղանդ ոսկի և 360 նժույգ հարկ: Հայտնի է նաև, որ Քսերքսես արքան Հունաստան արշավելիս կիլիկեցիներից գնել էր 100 նավ, ինչպես նաև տեղի բնակիչներից, որոնց թվում կային հայեր, կազմել մեկ զորագունդ:

Պատմահայր Մ. Խորենացու հավաստմամբ՝ դեռ Տիգրանից առաջ հայ թագավոր Արամը գրավել էր Կապադովկիան՝ այնտեղ թողնելով իր ծառա մշակին:

Հայերի ելումուտը Կիլիկիա և աստիճանաբար հաստատվելը հիմնականում տեղի է ունենում Տիգրան Մեծից սկսյալ, որը գրավել էր Լեոնային Կիլիկիան՝ դառնալով Հռոմի անմիջական հարևանը (մ.թ.ա. 103-102 թթ. Դաշտային Կիլիկիան գրավել էր հզոր Հռոմը: Այնտեղ հռոմեական առաջին պրոկոնսուլներից էին Մուլլան և հռչակավոր հռետոր Յիցերոնը): Արդեն մ.թ. IV դարում Կիլիկիան այնքան հայաշատ էր, որ նույն դարի հռոմեացի պատմիչ Ամմիանոս Մարկելոսը Միջերկրական ծովի հյուսիսարևելյան անկյունն անվանում էր Հայկական ծոց (խոսքը Ալեքսանդրեոսի ծոցի մասին է - Գ. Ռ.)¹: Մի հանգամանք, որն աներկբայորեն վկայում է հայերի՝ հոծ զանգվածներով Կիլիկիայում հաստատվելու մասին: IV դարի երկրորդ կեսին Կոկիսոն արքսրված Հովհան Ոսկերեքանը իր նամակներից մեկում շնորհակալություն էր հայտնում հայազգի տեղացիներին, մասնավորապես Դիոկորոս անունով ազնվականին՝ բարեսրտության և իրեն օգնելու համար: Հայ էր նաև Անտիոքի Մելիտոս եպիսկոպոսը (Հովհան Ոսկերեքանի ուսուցիչը): Մա, անկասկած, խոսում է այդ շրջաններում հայերի քաղաքական կշռի և ազդեցության աճի օգտին: Կիլիկիայում ստվար հայության գոյության ապացույցն էր և այն, որ VI դ. Քրիստափոր կաթողիկոսը հատուկ կոնդակով կիլիկիահայությանը պատվիրեց չհարել նեստորականությանը²:

Բյուզանդիայի վարած քաղաքականության պատճառով XI դ. սկզբին տեղի է ունենում Վասպուրականի հայ բնակչության արտագաղթը Կիլիկիա: XI դ. երկրորդ կեսին թուրք-սելջուկների ավերիչ արշավանքները, խաղաղ և ստեղծագործ բնակչության կոտորածն ու կողոպուտը, պետականության անկումը պատճառ հանդիսացան դեպի Կիլիկիա հայերի նորանոր արտագաղթների համար: Նույն

¹ Պողոսեան Յ., Հաճընի ընդհանուր պատմությունը եւ շրջակայ Գոգան Տաղի հայ գիւղերը, Լուս Անճելըս, 1942, էջ 13:

² Նույն տեղում, էջ 14:

դրդապատճառներից ելնելով՝ Կարսի Գագիկ արքան իր թագավորությունը հանձնում է Բյուզանդիայի կայսր Կոնստանտին Դուկասին՝ փոխարենը ստանալով Կիլիկյան Տավրոսում գտնվող Ծամնդավ բերդադաշտը: 1073 թ. իր գորաջողատով Կիլիկիա է տեղափոխվում Գանձակի շրջանում գտնվող Մայրեացքուրի հայ իշխան Օշինը՝ հաստատվելով Լամբրոն և Պապեռոն բերդերում: Դրա հետևանքով արդեն XI դ. 40-ական թթ. Կիլիկիայում և հարակից շրջաններում, մինչև Մեծ Հայքի սահմանները ձգվող տարածքում առաջանում են Բյուզանդիայից վասալային կախվածության մեջ գտնվող մի քանի հայկական իշխանություններ (Փիլարտոս Վարաժնունու, Աբլղարիբ Արծրունու, Գող Վասիլի, Օշինյանների և այլն):

1080 թ. Լեոնային Կիլիկիայում Բյուզանդիայի դեմ ապստամբում է Ռուբեն իշխանը և, վտարելով բյուզանդացիներին, հիմք է դնում հայկական անկախ իշխանությանը Կիլիկիայում: Այն պատմության մեջ հայտնի է Ռուբինյան իշխանություն (1080-1198), իսկ ավելի ուշ՝ Ռուբինյան թագավորություն անունով:

Աստիճանաբար հզորանալով՝ Ռուբինյանները հաստատվում են նաև Դաշտային Կիլիկիայում: Օգտագործելով խաչակրաց արշավանքները, իր հակառակորդների միջև առկա հակամարտությունը, ճիշտ կողմնորոշվելով տարբեր երևույթների և իրադարձությունների բարդ խաչաձևումներում, հենվելով ներքին հզորության վրա՝ Կիլիկիայի Լեոն Բ իշխանը 1198 թ. Տարսոն քաղաքում իրեն թագավոր է հռչակում, որի հետ կամա թե ակամա հարկադրված էին հաշտվել թե՛ Եվրոպան, թե՛ Արևելքը:

Այնուհետև՝ մինչև XIII դ. 60-70-ական թթ., հետևում է Կիլիկիայի հայկական թագավորության հզորացման ժամանակաշրջանը (Հեթում Ա թագավորի օրոք): Մակայն XIV դ. մահմեդական պետություններով շրջափակված Կիլիկիան գնալով ավելի ու ավելի է թուլանում, երկրում խորանում է քաղաքական ճգնաժամը: Դրա հետևանքով 1375 թ. եգիպտական մամլուկների, Տարսոնի և Հալեպի ամիրայությունների հարվածներից կործանվում է Կիլիկիայի հայկական պետությունը³:

Թագավորության կործանումից հետո մեզ սակավ և կցկտուր տեղեկություններ են հայտնի միջնադարյան Կիլիկիայի պատմության վերաբերյալ: Ստույգ հայտնի է սակայն, որ, չհաշտվելով ստեղծված իրադրության, պետականության կորստի հետ, հատկապես Լեոնային Կիլիկիայի հայերը համառ և անզիջում պայքարի գնով շուրջ 50 տարի ի գործու են եղել պաշտպանել իրենց անկախությունը: 1370-ական թթ. Մարաշում, Զեյթունում և շրջականերում իր իշխանությունն էր հաստատել Զյուլ Կադիր օղլուների ցեղը, Սիսն իր շրջակայքով գտնվում էր Ռամազան օղլուների տիրապետության ներքո, իսկ 1405-1431 թթ. Կիլիկիայում առավել հզորության էր հասել Կարաման օղլուների ցեղը, «որի տիրապետության ժամանակաշրջանից էլ

³ Կիլիկիայի այս շրջանի պատմության մասին մանրամասն տե՛ս **Микаелян Г.** История Киликийского армянского государства, Е., 1952.

Կիլիկիայի մի մասն սկսեց կոչվել Կարամանիա»⁴:

1482 թ. օսմանյան թուրքերը սուլթան Բայազիդի գլխավորությամբ պարտության մատնեցին Կարաման օղլուներին և, շարունակելով առաջխաղացումը, առաջին անգամ ոտք դրեցին Կիլիկիո հողին: Սակայն նրանց իշխանությունը հաստատուն չէր: Ավելի քան երկու դար Կիլիկիան գտնվում էր ավշարական ծագում ունեցող Գոզան օղլուների տիրապետության ներքո, որոնք մինչև XIX դ. կեսերը պահպանեցին իրենց իշխանությունը՝ համակերպվելով Զեյթունի, Հաճընի, Բեյլան և Գյավուր լեռների հայերի կիսանկախ վիճակի հետ, բավարարվելով «մի թեթև հարկով և չէին խառնվում այդ անկախ հայերի ներքին կառավարության մեջ»⁵: Այսպես, ցանկանալով այցելել Լեռնային Կիլիկիա, 1852 թ. Սսի կաթողիկոսին է դիմում ֆրանսիացի հայտնի ճանապարհորդ Վ. Լանգլուան, խնդրում նրա աջակցությունը՝ ցույց տալով նահանգապետի ֆիրմանը, որին կաթողիկոսը պատասխանում է, որ կուսակալը «Ատանայի Տարսոնի վրա կիշխե, իսկ լեռան տիրողը Խոզան-օղլուն է»⁶:

1832 թ. Կիլիկիա է ներխուժում Եգիպտոսի Մուհամմեդ Ալի փաշան՝ զգալի տարածքներ գրավում (Իբրահիմ փաշան նույնիսկ գրավում է Ադանան), սակայն մեծ տերությունների միջամտության շնորհիվ, 1840 թ. Լոնդոնում կնքված պայմանագրի համաձայն, գրավված շրջանները վերադարձվում են Օսմանյան Թուրքիային: Թուրքական իշխանությունները միայն 1866 թվականին՝ Զեյթունի ապստամբությունից մի քանի տարի հետո, միայն ի գործու եղան ճնշելու Ռամազանների, Զյուլգաստիքների, Կարամանների և Գոզան օղլուների ընդվզումները և Լեռնային Կիլիկիայում հաստատելու իրենց տիրապետությունը⁷, սկսելով երկրամասի մահմեդականացման, ավելի ուշ՝ թուրքացման քաղաքականությունը:

Պատմաբանները տարակարծիք են Կիլիկիայի XIX դ. վերջի և XX դ. սկզբի բնակչության թվի վերաբերյալ: Թուրքիայում երբեք ճիշտ կազմակերպված, հավաստի վիճակագրություն չի եղել, ուստի խիստ դժվար է Կիլիկիայի բնակչության, առավել ևս հայ ազգաբնակչության թվաքանակի ճշգրտումը, քանզի մարդահամարների տվյալներում օսմանյան իշխանությունները միանգամայն միտումնավոր նվազեցնում էին հայերի թիվը:

Ինչպես գիտենք, հայերը և հույները Կիլիկիայում բնակություն էին հաստատել դարեր առաջ՝ դրանով իսկ վաստակելով բնիկության իրավունք, ավելի ուշ՝ քրդերը, որոնց մասին հիշատակվում է IX դ. աղբյուրներում: XI-XII դդ.՝ սելջուկ-թուրքերի արշավանքների և տիրապետության ժամանակաշրջանում, Կիլիկիայում

⁴ Պողոսյան Հ., Զեյթունի պատմությունը, Ե., 1969, էջ 96: Տե՛ս նաև Ալպոյաճեան Արշակ Ա., Պատմություն հայ Կեսարիոյ, Ա. հատոր, Գահիրե, 1937, էջ 72:

⁵ Առաքելեան Հ., Զեյթուն, Տեղագրական, ազգագրական եւ վարչական տեսություն, Թիֆլիզ, 1896, էջ 14, 38:

⁶ Նույն տեղում, էջ 39:

⁷ Քիւրքճեան Վ., Հայկական Կիլիկիա: Ուսումնասիրություն մը Կիլիկիոյ Հայկական թագաւորութեան վրայ: Պանծալին Այաս, Նիւ Եորք, 1919, էջ 31: Տե՛ս նաև Առաքելեան Հ., նշվ. աշխ., էջ 13:

աստիճանաբար սկսել էին հաստատվել թուրքական ծագում ունեցող ցեղերը (20-22 ցեղ), ապա ավազները, արաբանսարիները, թուրքերը, իսկ 1864 թ.՝ Կովկասից գաղթած չեչենները, որոնք 1890-ական թթ. կազմում էին մոտ 1000 տուն⁸: Մ. Քելեշյանի հավաստմամբ՝ Կիլիկիայում բնակվում էին թուրքեր, չերքեզներ, թուրքմեններ, քրդեր, ավազական ծագում ունեցող ցեղեր, արաբ-անսարիներ կամ ֆելլահներ, հույներ և այլն⁹:

Ղ. Ալիշանն իր «Միսուանում» բերում է 1885 թ. վերաբերող տվյալներ, ըստ որոնց՝ Կիլիկիայի հայության թիվը կազմում էր 75000 կամ 15000 տուն¹⁰: Անտարակոյս, այս տվյալները շատ հեռու են իրական պատկերն արտացոլելուց:

Վ. Լանգլուան Կիլիկիո ողջ բնակչության թիվը ցույց է տալիս 150000 այն դեպքում, երբ նույն տարիներին եվրոպացի մեկ այլ ճանապարհորդ՝ Բայքորը, նշում է 300000: Ցավոք, մեզ անծանոթ են նրանց տվյալների աղբյուրները: Բերենք Վ. Լանգլուայի տվյալները Սսի կաթողիկոսությանը ենթակա հայերի թվի մասին (վիճակագրությունը կազմված է 1850 թ.):

Աղյուսակ 1

1	Ադանայի վարչական շրջան	
	Միս	200 տուն
	Ադանա	800 տուն
	Տարսոն	100 տուն
	Գյավուր դաշի գավառ	50 տուն
2	Մարաշի վարչական շրջան	
	Ֆոնուզ	600 տուն
	Հաճըն	500 տուն
	Զեյթունի գավառ	3000 տուն
	Մարաշ	700 տուն
3	Հալեպի վարչական շրջան	
	Այնթապ	1300 տուն
	Հալեպ	200 տուն
	Անտիոք	900 տուն
	Քիլիս	150 տուն
	Կիպրոս	400 տուն
	Գումար	13 400 տուն ¹¹

⁸ Գալուստեան Գ., Մարաշ կամ Գերմանիկ եւ հերոս Զեյթուն, Նիւ Եորք, 1934, էջ 9:

⁹ Քելեշեան Մ., Միս-Մատեան, Պատմական, բանասիրական, տեղեկագրական, ազգագրական եւ յարակից պարագաներ, Պէրուր, 1949, էջ 19:

¹⁰ Գալուստեան Գ., նշվ. աշխ., էջ 9:

¹¹ Առաքելյան Հ., նշվ. աշխ., էջ 45-46:

Թողնենք այն, որ Հալեպը, Անտիոքը և առավել ևս Կիպրոսը չեն մտնում Կիլիկիայի աշխարհագրական սահմանների մեջ: Եթե ընտանիքի միջին մեծությունը հաշվենք 5 հոգի, ապա Կիլիկիոյ ողջ հայ ազգաբնակչության թիվը կկազմի 67 000 մարդ: Հարկ է նշել, որ բացի Զեյթունի (որի հայության թիվը համեմատաբար ճիշտ է ներկայացված) և Գյավուր դաղի գավառակների, որոնք Վ. Լանգլուան սխալմամբ համարում է գավառներ, հայ բնակչության թվական տվյալները վերաբերում են հիմնականում քաղաքներին, քիչ թե շատ խոշոր բնակավայրերին և ոչ թե նաև գյուղերին, ինչպես նաև մի շարք այլ շրջաններին (Մամեստիա, Անթաքիա, Սուետիա, Լաթաքիա, Մերսին, Ինջիրլիկ և այլն), որոնց հայ բնակչությունը, անկասկած, չի հաշվարկվել: Ուստի պարզ է, որ Վ. Լանգլուայի տվյալները չեն համապատասխանում իրականությանը:

1894 թ. հրատարակված «Արաքսի» Կիլիկիայի համաձայն՝ երկրամասի ողջ բնակչության թիվը կազմում էր 403000 մարդ, որոնք բնակվում էին 1629 գյուղերում, 20 քաղաքներում և ավաններում: Ըստ այստեղ արձանագրված տվյալների՝ քրիստոնյաների թիվը Կիլիկիայում հաշվվում էր 168990, որից 97450-ը՝ հայ (69300 առաքելական, 15000 կաթոլիկ և 16000 բողոքական), 46000 հույն, 21000 ասորի, 93200 թուրք, 39600 քուրդ և թուրքմեն, 13200 չերքեզ, 12000 արաբ, 4 400 պարսիկ, 72000 տարբեր ազգության և դավանանքի պատկանող քոչվորներ, 4 539 եվրոպացի և այլն¹²:

1914 թ. հրատարակված Ա. Պիպեռճյանի «Գրպանի նորագույն ատլասը» Կիլիկիայի բնակչությունը ցույց էր տալիս 500000՝ յուրաքանչյուր քառ. կմ վրա հաշվելով 12 մարդ: Իսկ ֆրանսիացի գնդապետ, 1919 թ. Կիլիկիայում ֆրանսիական վարչական վերահսկողության ղեկավար նշանակված Է. Բրեմոնի 1921 թ. լույս տեսած «Կիլիկիա (1919-1921)» գրքույկում Կիլիկիոյ ազգաբնակչությունը հաշվվում է 400000 մարդ (1912 թ. տվյալներով), որից 215000 քրիստոնյա և 185000 մահմեդական: Ցավոք, Է. Բրեմոնը չի նշում, թե քրիստոնյա ազգաբնակչության քանի տոկոսն էին կազմում հայերը¹³:

Ինչպես արդեն նշել ենք, թուրքական կառավարությունը միանգամայն միտումնավոր և հասկանալի պատճառներով նվազեցնում էր հայերի թիվը ողջ կայսրությունում՝ ջանքեր չխնայելով հնարավորինս քիչ ներկայացնելու այն: Ուստի պատահական չէ, որ Ադանայի վիլայեթի հայության թիվը ներկայացվում էր 100000 (Կիլիկիոյ ողջ ազգաբնակչության 1/8 մասը): Ինչպես նշել է այս հարցի ուսումնասիրողներից մեկը, «Արդի Կիլիկիայում տիրող տարրը ոչ-քրիստոնեայն կամ թուրքը կ'նկատուի. բայց տարբեր և սակայն իրական տեսութեամբ մը քրիստոնեա տարրը կամ հայն է Կիլիկիայի նշանակութիւն տուողը»¹⁴:

Այսպես, ըստ օսմանյան կառավարության 1892 թ. պաշտոնական վիճակագրության՝ Ադանայի վիլայեթում բնակվում էր 225000 մահմեդական (ողջ

¹² Մատենադարան «Արաքսի», Կիլիկիա, Փորձ աշխարհագրութեան արդի Կիլիկիոյ (այսուհետև՝ Կիլիկիա...), Պետերբուրգ, 1894, էջ 15:

¹³ Bremon E. La Cilicie en 1919-1921, Paris, 1921, p. 10.

¹⁴ Բակուրան, Կիլիկիա, Թիֆլիս, 1896, էջ 10:

ազգաբնակչության 56 %-ը), 97000 հայ (24%), 75000 այլազգի քրիստոնյա (19 %), ընդհանուրը՝ 400000 մարդ: Հատկանշական է, որ մահմեդականների թիվը չի նշվում ըստ ազգային պատկանելության: Հալեպի վիլայեթում բնակվում էր 790000 մահմեդական (75 %), 49000 հայ (5 %), և 136000 այլազգի քրիստոնյա (ընդամենը՝ 995000 մարդ)¹⁵: Եթե ճշմարտության փոքր մաս կա վերոհիշյալ վիճակագրությունում, ապա դա, անտարակույս, մահմեդականների թեկուզ ուռճացված թիվն է: Կասկած չի հարուցում, որ ինչպես հայերի, այնպես էլ այլազգի քրիստոնյաների թիվը կտրուկ նվազեցված է: Համաձայն գրանցված պաշտոնական տվյալների՝ Ադանայի և Հալեպի վիլայեթներում հայերի թիվը կազմում էր 146000: Դա, ինչպես նկատել է Հ. Առաքելյանը, «պետք է ընդունել եթե ոչ պակասեցրած, գեթ իբրև *minimum*, ի նկատի ունենալով, որ թիւրքաց կառավարութիւնը, Բեռլինի կոնգրեսից հետո, շարունակ աշխատել է հայերի թիւը պակաս, իսկ մուսուլմանների թիւը աւել ցույց տալ»¹⁶: Եվ հետո այդ թիվը վերաբերում է միայն առաքելական եկեղեցուն դավանող հայերին, իսկ Կիլիկիայում, ինչպես հայտնի է, զգալի թիվ էին կազմում նաև կաթոլիկ և բողոքական հայերը, որոնց թուրքական իշխանությունները միտումնավոր տարանջատում էին իրենց ազգակիցներից՝ դասելով «այլազգի» քրիստոնյաների շարքում:

Հայերի թիվը Կիլիկիո թեմերում (հաշվարկված են ոչ բոլորը - Ռ.Գ.) «Արարատ» ամսագիրը 1895 թ. հունվարյան համարում նշում է 267 000¹⁷:

Հավաստի են Կ. Պոլսի պատրիարքարանի վիճակագրական տվյալները, ըստ որոնց՝ հայերի թիվը Կիլիկիայում Ուրֆայի (32600), Յոզղատի (28500) և Հալեպի (9878) սանջակների հետ հասնում էր 411000-ի: Նշենք, որ այդ սանջակների որոշ շրջաններ ներառված էին Կիլիկիայի աշխարհագրական տարածքի մեջ¹⁸:

Կիլիկիայի բնակչության մասին մանրամասն տեղեկություններ է հաղորդում Պետերբուրգի պոլիտեխնիկական ինստիտուտի ուսանող Միքայել Յիցիկյանը, որը, կիլիկիահայության տնտեսական վիճակն ու կենցաղն ուսումնասիրելով, միաժամանակ արժեքավոր նյութեր է հավաքել երկրամասի հայության թվի վերաբերյալ: Նրա հաշվումների համաձայն՝ կիլիկիահայության թիվը 1913 թ. կազմում էր 388 600 մարդ, որն ավելին էր ազգաբնակչության ընդհանուր թվի 1/5-ից¹⁹: Կ. Բասմաջյանի տվյալներով՝ Առաջին աշխարհամարտի նախօրեին Կիլիկիայում բնակվում էր 388000 հայ (875604-ից)՝ բնակչության ընդհանուր թվի 43,4%-ը²⁰:

Բոլոր փաստերը համադրելով՝ կարելի է համարձակորեն պնդել, որ XX դ. սկզբներին Կիլիկիայում հայերի թիվը կազմում էր մոտ 400000: «Կիլիկիայի հայության

¹⁵ Տե՛ս Առաքելեան Հ., նշվ. աշխ., էջ 47:

¹⁶ Նույն տեղում, էջ 48:

¹⁷ Նույն տեղում:

¹⁸ Հայաստանի ազգային արխիվ, ֆ. 57, ց. 1, գ. 399, թ. 5:

¹⁹ Մշակ, Թիֆլիս, 31.VII.1913, N 166:

²⁰ Basmadjian K. J. La Cilicie. Son passe et son avenir, Paris, 1919, p. 6.

թիվը,- գրել է «Մշակ» թերթը,- 400000-ից պակաս չէ»²¹: Չնայած բազմաթիվ և պարբերաբար կրկնվող ջարդերին, տնտեսական, քաղաքական, ազգային և կրոնական հալածանքներին և այն հանգամանքին, որ այդ ամենից փրկվելու համար բազմաթիվ հայորդիներ լքում էին հայրենական օջախները (միայն Ադանայի 1909 թ. կոտորածից հետո Կիլիկիայից արտագաղթեցին մի քանի տասնյակ հազար հայեր)՝ երկրամասում հայերը բացահայտ մեծամասնություն էին կազմում²²:

Համաձայն 1864 թ. վարչական բաժանման՝ Կիլիկիան կազմում էր Ադանայի ամբողջ կուսակալությունը և Մարաշի սանջակը, որը Հալեպի վիլայեթի մի մասն էր: Կիլիկիայի մաս էին նաև 1866 թ. կազմավորված Հալեպի նահանգի նույնանուն գավառի առանձին կազաներ Ալեքսանդրետն ու Այնթապը: Ադանայի վիլայեթի արևմտյան կեսը Ալայա քաղաքից փոքր-ինչ արևելք ընկած Բմամլու ավանն էր, իսկ մյուս կողմից՝ Հայոց ծոցի ափին, սահմանը վերջանում էր Ալեքսանդրետից մի փոքր հարավ: Այն ընդգրկում էր 40 000 կմ տարածք:

Արևմուտքից վիլայեթը սահմանակից էր Բկոնիայի վիլայեթին, հյուսիսից՝ Անգորայի, Մեֆաստիայի (Սըվազ) վիլայեթների աննշան մասին, արևելքից, ինչպես նաև փոքր-ինչ հարավից՝ Հալեպի կամ Բերիայի վիլայեթին (Հալեպի և Մարաշի սանջակներով (գավառներով): Նշենք, որ Մարաշի սանջակը Հալեպի վիլայեթի մեջ է ընդգրկվել 1880 թվականին:

Վարչականորեն Ադանայի վիլայեթը բաժանվում էր 5 գավառների կամ սանջակների. 1) Ադանա, 2) Մերսին, 3) Ջեբել-Բերեքեթ, 4) Գոզան, 5) Իչիլի կամ Սելևկիա: Յուրաքանչյուր սանջակ բաժանվում էր կազաների (գավառակների), որոնք էլ իրենց հերթին բաժանվում էին նահիեների (գյուղախմբերի), իսկ նահիեները՝ քարիեների (գյուղերի): Ամենաուշ ձևավորված սանջակը Մերսինն էր՝ 1888 թ., երբ ավարտվեց Ադանա-Մերսին երկաթուղու կառուցումը, որով վերջինս կարևոր նշանակություն ձեռք բերեց առևտրատնտեսական առումով:

Ողջ նահանգը վարչականորեն բաժանվում էր 5 սանջակի, 19 կազայի և 21 նահիեյի՝ 220000 քրիստոնյա և 185000 մահմեդական ազգաբնակչությամբ²³:

Այս տվյալները, որոշ տարբերություններով հանդերձ, համապատասխանում են այլ ուսումնասիրությունների²⁴: Վարչական միա-

²¹ Մշակ, 31.VII.1913, թիվ 166:

²² Կիլիկիայի հայ ազգաբնակչության թվի մասին տե՛ս նաև **Marashlian L.** Politics and Demography Armenians. Turks and Kurds in the Ottoman Empire, Cambridge, Paris, Toronto, 1991, pp. 69, 122-123, 170.

²³ **Redan P.** La Cilicie et le Probleme Ottoman, Paris, 1921, p. 15.

²⁴ «Արաքսի» Կիլիկիայի համաձայն՝ վիլայեթը բաժանված է եղել 4 սանջակների (Ադանայի, Իչիլի, Գոզանի և Ջեբել Բերեքեթի), 19 կազայի և 23 նահիեյի՝ 1629 գյուղերով, 20 քաղաքներով և ավաններով (էջ 39): Տե՛ս նաև **Գալուստյան Գ.**, նշվ. աշխ., էջ 13-15 (այստեղ տարբերությունը

Ադանայի նահանգ

Ադանայի գավառ	Մերսինի գավառ	Ջերեկ-Բերե- քթի գավառ	Գոզանի գավառ	Իշլի գավառ
Կազաներ	կազաներ	կազաներ	կազաներ	կազաներ
1. Ադանա 2. Գարա- Բաալու 3. Համիդիե	1. Տարսուն 1 կազա և 3 գ.խումբ	1. Ջերեկ-Բերեքթ 2. Բալահիյե 3. Պայաս 4. Օսմանիե 5. Խասա 6. Պահճե (Պայաս)	1. Միս 2. Գարս-ուլ Գատրիե 3. Հաճըն 4. Վահկա 4 կազա և 4 գ.խումբ	1. Իշլի 2. Արմենակ 3. Մութ 4. Գյուլնար 5. Անամուռ
3 կազա և 7 գ.խումբ		6 կազա և 4 գ.խումբ		5 կազա և 7 գ.խումբ

վորները հաճախ ենթարկվում էին փոփոխությունների՝ գավառից վերածվելով գավառակի մեկի կազմից մյուսին անցնելով, «Ինչպես օրինակ՝ Ճեպել Պերեքթի սանճազը 1870-ականներուն ուներ 2 գազայ, իսկ 1880-ականներու վերջաւորութեան՝ 5 գազայ (ինչպես վերը նշել ենք տարբեր աղբյուրներ Ջերեկ-Բերեքթի կազաների թիվը նշում են նաև 6 - Գ. Ռ.), իսկ 1910-էն ետք՝ 4 գազայ»²⁵։

Աշխարհագրական առումով, ինչպես նշել ենք, Կիլիկիան ընդգրկում է 40000 քառ կմ տարածություն (ներառյալ՝ Մարաշի սանջակը և Այնթապի կազան), բայց Հայկական Կիլիկիան (Կիլիկիայի հայկական պետությունը XI-XIV դդ.) տարածվում էր շատ ավելի հեռու. Կոնիայի, Խարբերդի, Սեբաստիայի վիլայեթների որոշ շրջաններ և Հալեպի վիլայեթի բավական ընդարձակ մի տարածք մտնում էին հայկական պետության սահմանների մեջ։ Ռաս-էլ-Խանձիր հրվանդանի հյուսիսարևելյան ուղղությամբ մինչև Հռոմկլա ընկած գծի հյուսիսային կողմում էին Մարաշի սանջակը և Հալեպի կենտրոնական գավառի մի մասը՝ Բեյլանի և Ալեքսանդրետի գավառները, մեկական շրջան Քիլիսի և Այնթապի գավառներից, որոնք նույնպես մտնում էին Կիլիկիայի տարածքի մեջ²⁶։

վերաբերում է միայն գյուղախմբերի թվին)։ Առաքելյան Հ., նշվ. աշխ., էջ 49-50, Marashlian L., նշվ. աշխ., էջ 122-123։ Առանձին հեղինակների մոտ տարբերվում են գավառների, գավառակների և գյուղախմբերի թվերը, որը պայմանավորված էր հաճախակի կատարվող վարչական ներքին փոփոխություններով։

²⁵ Մալքի Մալտրճեան, Կիլիկիոյ վարչական բաժանումները 19-րդ դարու վերջաւորութեան եւ 20-րդ դարու սկիզբը, Հայոց պատմության հարցեր (գիտական հոդվածների ժողովածու), N 11, Ե., 2010, էջ 135, 136։

²⁶ Գալուստեան Գ., նշվ. աշխ., էջ 15։

Որպես առանձին վարչական միավոր՝ Մարաշի սանջակը սահմանակից էր Խարբերդի վիլայեթին, հյուսիսում՝ Սեբաստիային, արևմուտքում՝ Ադանայի վիլայեթին, իսկ հարավում՝ Հալեպի նահանգի նույնանուն գավառին՝ ընդգրկելով 18.405 քառ.կմ տարածություն: Ըստ «Արաքսի» Կիլիկիայի՝ 1890 թ. Մարաշի գավառը բաժանված էր 5 գավառակի (5 նահիե, 552 գյուղ), իսկ 1905 թ. հրատարակված «Մալնամեի Դելեթի Օսմանիեի» պաշտոնական վիճակագրության համաձայն՝ սանջակի կազմում էին Մարաշի և նրան ենթակա Զեյթունի, Ալպիսթանի, Անտերունի և Փազարձըզի (Բազարջիկ) գավառակները՝ 23 գյուղախմբերով և 459 գյուղերով: Կ. Պոլսի հայոց պատրիարք Մ. Օրմանյանի վիճակագրական տեղեկությունների համաձայն (1912 թ.)՝ Մարաշ քաղաքում և շրջակայքում հայ բնակչության թիվը հասնում էր 37500-ի, Զեյթունում՝ 21000-ի, Ֆրնուզում՝ 7000-ի: Գավառի 178000 բնակիչներից հայեր էին 65000-ը²⁷: Իսկ Պ. Ռըդանի տվյալներով՝ գավառի բնակչության թիվը 160 000 էր, ձնշող մեծամասնությամբ՝ հայեր²⁸:

Աղյուսակ 3

Հալեպի վիլայեթ

Հալեպի գավառ	Ուրֆայի գավառ	Մարաշի գավառ
Կազաններ	Կազաններ	Կազաններ
1. Հալեպ	1. Ուրֆա	1. Մարաշ
2. Այնթապ	2. Բուս-Կալե (Հռոմկլա)	2. Զեյթուն
3. Քիլիս	3. Սուրուճ	3. Ալպիսթան
4. Բեյլան	4. Բիրեջիկ	4. Անտերուն
5. Ալեքսանդրետ		5. Փազարձըզ
6. Անտիոք		
7. Հաբիմ		
8. Զիզը-Շոր (Ճարը-Շղուր)		
9. Իդլիփ		
10. Մուարաթ		
11. Բահ-Ջեբուլ		
12. Մեհրիջ	4 կազա	5 կազա, 28 գյուղախումբ
13. Ռեքքա		
13 կազա		

Հարկ է նշել, որ հայ ազգաբնակչության աճի վրա ազդել էին և՛ 1890-ական թթ. ջարդերը, և՛ անապահով կյանքի, ազգային հալածանքի հետևանքով տեղի ունեցող արտագաղթը, և՛ 1909 թ. կոտորածները:

Ինչպես վերը նշել ենք, աշխարհագրական առումով Կիլիկիայի տարածքում էին նաև Այնթապը (8 նահիե, 202 գյուղ), Քիլիսը (7 նահիե, 460 գյուղ) և Ալեքսանդրետը (1 նահիե, 24 գյուղ):

Այսպիսով, Կիլիկիան բաժանված էր Ադանայի և Հալեպի նահանգների միջև՝ իր կազմում ունենալով 10 գավառ, 24 գավառակ և ավելի քան 4000 գյուղ:

²⁷ Նույն տեղում, էջ 17:

²⁸ Redan P., նշվ. աշխ., էջ 16:

**АРМЯНСКОЕ НАСЕЛЕНИЕ И АДМИНИСТРАТИВНОЕ
ДЕЛЕНИЕ КИЛИКИИ В КОНЦЕ XIX – НАЧАЛЕ XX ВВ.**

ГАСПАРЯН Р. Г.

Резюме

Армяне стали заселять Киликию со времен правления Тиграна Великого, а в IV в. нашей эры Киликия была почти полностью заселена армянами, поэтому римский историк Аммиан Марцелин северо-восточную часть Средиземноморья называл Армянским заливом.

В конце XIX–начале XX вв. этот регион был населен армянами, турками, курдами, черкесами, греками, арабами и другими народами. Османские власти умышленно сокращали численность населения армян в империи. Следовательно, не случайно численность армянского населения в провинции Адана была представлена властями в размере 100000 чел. На основе изучения данных армянских и иностранных источников можно утверждать, что армяне в Киликии составляли большинство – около 400000 чел.

Киликия была разделена между провинциями Адана и Алеппо. В ее состав входили 10 городов, 24 сельские общины и свыше 4000 деревень. Состав административных округов часто изменялся: города становились сельскими общинами, переходя из одного административного района в другой, что было обусловлено желанием изменить демографическую картину региона в пользу мусульманского населения.